

# INUIT ATAQATIGIIT

## Inatsisartuni



UKA 2018/229  
2018  
Stine Egede

**Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalakkersuisunut kaammattuutigaa aalisarnermi ilinniartitaanerit eqqarsaatigalugit nunat akornanni suleqatigiinnissamut periarfissat misissoqullugit.**

(Aallartitat siulittaasuat Vivian Motzfeldt)

Siunnersuummut isumalluarnartumut Inuit Ataqatigiinni imaatumik oqaaseqaateqassaagut.

Aalisarnermik inuussutissarsiuteqarnerup pilerinarnerulernissaannik, kiisalu nunatsinni inuussutissarsiutitta annersaata suli ineriartorteqqinnissaanut periarfissanik ujartuijuartariaqarpugut.

Imaanimi pisuussutivut ukiorpassuarni paarilluarutsigit, kingunissavut pissaqartuassapput. Nerisassaqartuassaagut pilluaatitsinnik, aalisartortavullu pisassaqartuassapput.

Siunnersuutip matuma periarfissanik annertuumik ammaassinissaa qularutiginnngilarput.

Inuusuttut nunanut sanilerisatsinnut ilinniariarsinnaanissaasa periarfissarsiuunneqarsinnaanerata misissorneqarnissaata inissaminiilluinnarpoq, nunammi taakku amerlasuutigut inooriaatitsinnut nerisqaarnitsinnullu eqqaanartunik inooriaaseqartuummata. Qallunaat Nunaanuinarmi ilinniariarsinnaanngilagut.

Nunatsinni periarfissaasinnaasut qulaajarneqarsinnaasut arlaqarpud, ilaatigut INULI inerisaavigineqarsinnaanera, taamaalilluni aalisakkerinermik sammivilimmik immikkut ingerlatsisinnaanneq periarfissiuunneqarsinnaavoq.

Aammattaaq Imarsiormik Ilinniarfik qissimigaarneqarsinnaavoq, arlaatigut ililluni tapitartuuffigineqarsinnaanersoq.

DTU suleqatigilerneqareersimasoq atuarsinnaavarput Naalakkersuisup akissutaani. Tamannalu qujamasuutigarpud, taamaalillutik periarfissaasinnaasut Nunatsinni arlaqalereerput.

Nunat Avannarliit Killiit Siunnersuisoqatigiiffiata qaqitaat isumaqatigilluinnarparput, taamaattumik nuannaarutigarpud Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisup misissuissuinissamut siunnersuummut tapersiinerannut qujavugut, neriullutalu iluatsilluartumik misissuinerit ingerlajumaartut.

Taamak oqaaseqarluta, siunnersuut Kultureqarnermut, ilinniartitaanermullu ataatiimiitaliami aappassaaniigassanngorlugu ingerlateqqipparput.